



REPUBLIKA E SHQIPËRISË

**KOMISIONERI PËR TË DREJTËN E INFORMIMIT DHE
MBROJTJEN E TË DHËNAVE PERSONALE
DREJTORIA PËR MBROJTJEN E TË DHËNAVE PERSONALE**

Nr. 453/prot.
3

Tiranë më 27.03.2019

REKOMANDIM

Nr. 24, datë 27.03.2019

**PËR KONTROLLUESIN “SHKOLLA SHQIPTARE E ADMINISTRATËS
PUBLIKE”**

Në mbështetje të neneve 29, 30, 31 pika 1 gërma a/1 dhe 32 të ligjit nr. 9887 datë 10.03.2008 “Për Mbrojtjen e të Dhënave Personale” i ndryshuar, neneve 77-112 të ligjit nr. 44/2015 “Kodi i Procedurave Administrative të Republikës së Shqipërisë”, si dhe provave të administruara në ngarkim të kontrolluesit “Shkolla Shqiptare e Administratës Publike”,

KONSTATOVA SE:

Në zbatim të Urdhrit nr.93 datë 18.03.2019 të Komisionerit për të Drejtën e Informimit dhe Mbrojtjen e të Dhënave Personale, u krye hetimi administrativ pranë kontrolluesit “Shkolla Shqiptare e Administratës Publike”, me objekt:

- Zbatimi i neneve 18 dhe 21 të ligjit nr. 9887/2008 “Për mbrojtjen e të dhënave personale” i ndryshuar, dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit nga kontrolluesi “Shkolla Shqiptare e Administratës Publike”.

Shkolla Shqiptare e Administratës Publike (ASPA) është një institucion publik qendror me seli në Tiranë. Aktiviteti i ASPA-s synon formimin profesional të nëpunësve civilë, si dhe çdo individ tjetër vendas ose të huaj, që nuk është pjesë e shërbimit civil dhe që plotëson kriteret e kërkuara, sipas legjislacionit specifik.

Nga verifikimi i kryer në vend, rezultoi se:

1. Kontrolluesi nuk ka vendosur “Politikën e Privatësisë” në faqen zyrtare www.aspa.gov.al, me qëllim informimin e subjekteve të të dhënave të cilët aksesojnë dhe ngarkojnë të dhëna personale. Informacioni i publikuar në “Politikën e Privatësisë”, duhet të ketë për qëllim informimin e subjekteve të të dhënave që

vizitojnë këtë faqe mbi mënyrat e përpunimit të të dhënave, masat e sigurisë, ruajtjen e konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

Çdo kontrollues që përpunon të dhëna personale, pavarësisht faktit nëse përpunimi bëhet në mënyrë elektronike apo manuale, dhe pavarësisht faktit nëse mbledh apo jo të dhëna personale nëpërmjet faqes zyrtare, ka detyrimin që të publikojë "*Politikën e Privatësisë*", pasi kontakti paraprak i çdo subjekti të dhënash me kontrolluesin realizohet nëpërmjet faqes online në internet.

Zyra e Komisionerit vlerëson se mungesa e një rubrike të veçantë për "*Politikën e Privatësisë*" në faqen zyrtare të Kontrolluesit, privon subjektet e të dhënave personale nga e drejta për informim, sipas parashikimit të nenit 18 dhe të drejtat e parashikuara në Kreun IV "*Të drejtat e subjektit të të dhënave*", të ligjit nr.9887/2008 "*Për mbrojtjen e të dhënave personale*" i ndryshuar, duke mos u dhënë mundësi në ushtrimin e tyre dhe duke i cënuar ato.

Konstatimi përbën shkelje administrative të pikës 1, të nenit 18, të ligjit nr.9887/2008 "*Për mbrojtjen e të dhënave personale*" i ndryshuar: "*Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale...*" dhe Vendimit nr. 6/2013 "*Për përcaktimin e rregullave të hollësishme për sigurimin e të dhënave personale*".

2. Nga verifikimi i kryer në regjistrin elektronik të KDIMDP-së, protokollin e Zyrës së Komisionerit si dhe nga hetimi administrativ i ushtruar, rezultoi se nuk është përmbushur detyrimi për njoftim në zbatim të nenit 21, të ligjit nr. 9887/2008 "*Për Mbrojtjen e të Dhënave Personale*" i ndryshuar.

"*Njoftimi*" mbi përpunimin e të dhënave personale për të cilat kontrolluesi është përgjegjës, është i rëndësishëm pasi u jep mundësinë subjekteve të të dhënave që të informohen mbi kategorinë e të dhënave që përpunohen, qëllimin e përpunimit të tyre, realizimin e detyrimeve ligjore nga ana e kontrolluesit etj.

Konstatimi përbën shkelje administrative të pikës 1, të nenit 21, të ligjit nr.9887/2008 "*Për mbrojtjen e të dhënave personale*" i ndryshuar: "*Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji*".

Në përfundim të hetimit administrativ, referuar provave dhe konstatimeve në vend, grupi i kontrollit hartoi dhe nënshkroi në prani të palëve procesverbalin e hetimit administrativ. Lidhur me konstatimet e grupit të hetimit administrativ, përfaqësuesit e kontrolluesit nuk patën kundërshtime, por kërkuan kohë për plotësimin e detyrimeve ligjore.

Detyrimi për "Njoftim", sipas parashikimit të nenit 21 të ligjit nr.9887/2008 "Për mbrojtjen e të dhënave personale", është një detyrim që duhet plotësuar përpara fillimit të përpunimit nga ana e kontrolluesit. Ligji për mbrojtjen e të dhënave personale, që përcakton këtë detyrim, ka hyrë në fuqi në vitin 2008. Nga ana e kontrolluesit që nga kjo kohë deri në momentin e kryerjes së hetimit administrativ, nuk është ndërmarrë asnjë masë për plotësimin e këtij detyrimi ligjor.

Kontrolluesi ka reaguar për rikuperimin e shkeljeve vetëm pas hetimit administrativ, duke "Njoftuar" Zyrën e Komisionerit, mbi përpunimin e të dhënave personale nga "Shkolla Shqiptare e Administratës Publike".

Nga verifikimi i njoftimit të kontrolluesit, mbi përpunimin e të dhënave personale është konstatuar se është i nevojshëm përditësimi i tij sa i përket "të dhënat e kontrolluesit", "kategoritë e subjekteve të të dhënave", "qëllimet e përpunimit", "marrësit e të dhënave", etj.

Sa më sipër, në zbatim të neneve 18, 21, 22, 29, 30, 31 dhe 32 pika 1 të ligjit nr. 9887/2008 "Për mbrojtjen e të dhënave personale" i ndryshuar,

REKOMANDOJ:

1. Kontrolluesi "Shkolla Shqiptare e Administratës Publike" në zbatim të nenit 18, të ligjit nr. 9887/2008 "Për Mbrojtjen e të Dhënave Personale" i ndryshuar, të informojë subjektet e të dhënave mbi përpunimin e të dhënave personale, qëllimin e përpunimit, mjetet dhe mënyrat e përpunimit, përhapjen e të dhënave etj., nëpërmjet "Politikës së Privatësisë" në portalin zyrtar www.aspa.gov.al.
2. Kontrolluesi "Shkolla Shqiptare e Administratës Publike" në zbatim të nenit 21 dhe 22, të ligjit nr. 9887/2008 "Për Mbrojtjen e të Dhënave Personale" i ndryshuar, të ketë në vëmendje përditësimin e "Njoftimit", pranë Zyrës së Komisionerit, në lidhje me "të dhënat e kontrolluesit", "kategoritë e subjekteve të të dhënave", "qëllimet e përpunimit", "marrësit e të dhënave", etj, sipas pjesës arsyetuese të këtij rekomandimi.
3. Kontrolluesi "Shkolla Shqiptare e Administratës Publike", të kryejë të gjitha detyrimet që burojnë nga ligji dhe nga ky akt, brenda një afati 10 ditor nga momenti i marrjes dijeni dhe të njoftojë me shkrim Zyrën e Komisionerit për masat e marra. Përbushja e këtyre detyrimeve nga kontrolluesi, përbën objekt kontrolli të vazhdueshëm nga Zyra e Komisionerit.
4. Në rast mos përbushje të detyrimeve të caktuara, Komisioneri vepron sipas nenit 30/2 dhe 39 të ligjit nr. 9887/2008 "Për Mbrojtjen e të Dhënave Personale" i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të Rekomandimeve të tij, vendos sanksion me gjobë për kundërvajtjet

administrative dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 27.03.2019.

KOMISIONERI

Besnik Dervishi

